



Schweizerische Eidgenossenschaft
Confédération suisse
Confederazione Svizzera
Confederaziun svizra

**Autorità da recurs independenta
davart radio e televisiun AIRR**

Rapport annual 2021 da l'Autorità da recurs independenta davart radio e televisiun AIRR

Prefaziun

Puspè nagin „courant normal“ l’onn 2021. Be tematicamain, numnadamain cun vista sin il cuntegn da las emissiuns e publicaziuns ch’èn stadas da giuditgar, è l’onn passà sa preschentà sur la media sco zunt varià. Dal func mobil papal davart vairs spirituals fin a las stailletas da gender, dal conflict dal Giura fin a quai che succeda l’enviern mintgadi sin il plazzal fin a la violenza en chasas d’asil, dad in cumponist inspirà a Sevilla sco medis cubans che gidan fin a dumondas en connex cun l’islam: La banca da datas cun decisiuns da l’Autorità da recurs è daventada per insaquants cas pli ritga. Il sulet tema dominant eran, almain ils emprims mais, medemamain questa giada, rapports davart Corona.

Corona è stada la raschun, che ha laschà daventar realità quai che na fiss betg stà imaginabel avant in pèr onns: L’Autorità da recurs ha stui realisar insaquants dis da cussegliaziun digitalmain, siond che suspender ils cas pervia dal culm da pendenzas ord l’onn da record 2020 na fiss stada nagina alternativa. Ils problems technics n’ans han era betg schanegiads. Jau patratg qua vi da la sfida fin che tut ils commembers eran online ed èn restads colliads online vinavant. A partir da l’entschatta da la stad avain nus puspè pudì ans radunar fisicamain e finalmain era beneventar nossa nova commembra, la Friburgaisa Delphine Gendre. In avantatg han las deliberaziuns digitalas dentant gi: Ellas han promovì bler pli effectivamain la publicità sco giavischà dal legislatur. In uschè grond public interessà sco en il cas „Deville“ ha l’Autorità pudì registrar be darar (b. 878; JB 2021, cifra 7.3).

Quai ha effectuà in’ulteriura observaziun: Noss’Autorità da recurs è stada confruntada pliras giadas cun la supplica u propostas formalas da salvar sias predeliberaziuns publicas tras excluder il public. A basa da la lescha na pon ins betg correspunder mo uschia ad in tal giavisch. Il Tribunal federal ha refusà ina tala decisiun provisorica negativa. Il cumpromiss da l’Autorità da recurs da renunziar da numnar il recurrent pertutgà durant las tractativas ha l’Istanza giuridica considerà sco commensurà per uschia gulivar tranter l’interess da trasparenza privata e publica (Sentenzia DF 2C_327/2021 dals 05-10-2021; JB, cifra 8.1).

Avant dudesch mais hai jau terminà questa prefaziun cun la speranza che nossa societad returnia puspè ad in sa cuntegnair caracterisà da maniera e respect vicendaivel. En ils recurs da Corona da quest onn han ils recurrents populars adina puspè crititgà ch'ins taxeschia persunas che crititgeschian las mesiras immediatas sco snegaders, radicals da dretg, teoretichers conspirativs ed esoterichers. Latiers vuless jau cumpletter quest onn: Sche convischinas e convischins na dastgan betg crititgar publicamain tenor ils dretgs costituziunals – premiss che quai succedia legalmain, deschentamain e paschaivlamain – senza ch'els vegnian discriminads persuerter medialmain – alura sutminescha quai il fundament da noss stadi costituziunal democratic e na pussibilitass betg l'ulteriur svilup societar pervia da mancanza da cuntraversas necessarias cun opiniuns cuntrarias. Che quai mettess en privel la pasch sociala betg sulet teoreticamain, mabain era efectivamain, n'è cleramain nagina dumonda. Per cuntrafar a quai essan nus tuts responsabels. Ils recurs pertutgant Corona èn tuts vegnids refusads, sch'era na adina unanimamain.

Mascha Santschi Kallay
presidenta da l'AIRR

Cuntegn

1	Duairs, organisaziun e basas giuridicas	6
2	Cumposiziun da l'AIRR	7
3	Secretariat	7
4	Finanzas	7
5	Posts da mediaziun dals realisateurs da radio e televisiun	8
5.1	Posts da mediaziun dals realisateurs privats da radio e televisiun	8
5.2	Procedura	8
5.3	Insunter tranter ils Posts da mediaziun e l'Autoritad	10
6	Procedura da recurs	10
6.1	Gestiun	10
6.2	Publicaziuns crititgadas	11
6.3	Fatgs giuridics	11
6.4	Recurs approvads	12
7	Or da la pratica da l'AIRR	13
7.1	Decisiun b. 862/866/867, dals 28 da schaner 2021, pertutgant radio RTS, emissiun „Tout un monde“, contribuziun „Les médecins cubains envoyés à l'étranger en renfort dans la lutte contre Coronavirus“	13
7.2	Decisiun b. 877 dals 10 da matg 2021 pertutgant radio SRF, emissiun „Heute Morgen“ davart la cunvegna da basa tranter l'Uniun Europeica e Svizra	14
7.3	Decisiun b. 878 dals 10 da matg 2021 concernent televisiun SRF, emissiun „Deville“ davart l'iniziativa pertutgant la responsabladad dals concerns	15
7.4	Decisiun b. 879 dals 17 da zercladur 2021 davart televisiun RTS, emissiun „A Bon Entendeur“, contribuziun „La table-fantôme“	17

7.5	Decisiun b. 883 dals 17 da zercladur 2021 pertutgant RTS, emissiun radiofonica „La Matinale“, contribuziun „Pierre Maudet visite de nuit son ancien bureau“ e l'emissiun televisiva „Le 12h45“, contribuziun „Le Conseiller d'Etat s'est rendu régulièrement dans les locaux qu'il n'est plu censé frequenter. Enquête“	17
8	Tribunal federal	18
8.1	Deliberaziuns publicas da l'AIRR	18
8.2	Televisiun SRF, emissiun „DOK“ dals 4 da december 2019, „Der Preis der Aufrichtigkeit – Adam Quadronis Leben nach dem Baukartell“	19
9	Fatgs internaziunals	21
10	Giuventetgna e medias	21
11	Infurmaziun da la publicitad	22
	Agiunta I: Cumposiziun da l'AIRR	24
	Agiunta II: Indicaziuns statisticas per l'interval da 1984 – 2021	25

1 Duairs, organisaziun e basas giuridicas

Duairs, organisaziun e las basas giuridicas da l'Autoritad da recurs independenta davart radio e televisiun (abrevià: Autoritad da recurs) n'èn betg sa midads durant l'onn da gestiun.

L'Autoritad da recurs giuditgescha dapi il 1984 sco istanza giudiziala ed independenta da l'Administraziun da la Confederaziun davart recurs cunter cuntegns da las medias electronicas. Quai pertutga da preschent emisiuns da radio e televisiun da realisaturs svizzers da programs e l'ulteriura purschida publicistica da la Societad svizra da radio e televisiun (SSR). La tiers vegnan era cuntegns online (inclusiv medias socialas). Era appartegnan tar ils duairs da l'Autoritad da giuditgar recurs pervia d'access refusà tar in program da realisaturs svizzers e pertutgant la part redacziunala da l'ulteriura purschida publicistica da la SSR. L'Autoritad da recurs numna e surveglia plinavant ils trais Posts da mediaziun per ils realisaturs privats da radio e televisiun.

L'activitad da l'Autoritad independenta davart recurs da radio e televisiun sa basa sin l'art. 93, al. 5 da la Constituziun federala (Cst; CS 101). Tenor quella pon recurs cunter il program vegnir suttamess ad ina istanza independenta da recurs. Las disposiziuns executivas sa chattan en la Lescha da radio e televisiun (LRTV; CS 784.40), en l'Ordinaziun davart radio e televisiun (ORTV; CS 784.401) ed en il Reglament da fatschenta da l'Autoritad da recurs, approvà dal Cussegl federal (CS 784.409). Il dretg relevant internaziunal sco las determinaziuns da program applitgables da la Convenziun europeica per la televisiun transcunfinala (CETT; CS 0.784.405) na jogan da preschent nagina u be ina rolla subordinada, siond che quel na va betg pli lunsch ch'il dretg naziunal. Pertutgant la procedura vala cumplettantamain la Lescha federala davart la procedura administrativa (PA, CS 172.021).

Sco Cumissiun extraparlamentara da la Confederaziun valan per l'Autoritad da recurs las determinaziuns davart l'Ordinaziun statal-amministrativa (OSA; CS 172.010.1). L'Autoritad da recurs è ina Cumissiun che sa drizza tenor il martgà.

Il pachet da mesiras, approvà dal Parlament en favur da las medias (Lescha da medias), davart la quala vegn votà ils 13 da favrer 2022, na pertutga betg la cumpetenza da l'Autorità da recurs.

2 Cumposiziun da l'AIRR

Il Cussegl federal ha nominà ils 13 da schaner 2021 la giurista friburgaisa Delphine Gendre sco nova commembra da l'Autorità da recurs. Il 1 da favrer 2021 ha ella surpiglià sia incarica sco successura da Suzanne Pasquier Rossier, morta il settember 2020. Sco tar ils ulteriurs otg commembers en uffizi accessoric scada lur temp d'uffizi a la fin dal 2023. Ils grads d'occupaziun muntan a 25 pertschient per la presidenta Mascha Santschi Kallay, a 20 procents per la vicepresidente Catherine Müller ed a 15 pertschient per ils ulteriurs commembers (vesair la cumposiziun era en l'Agiunta 1).

3 Secretariat

Tar il Secretariat da l'Autorità, ch'accumpogna professionalmain ed amministrativmain la Cumissiun, n'hai dà naginas midadas personalas. Pervia dal volumen da lavur sur la media en consequenza dal dumber da record da recurs da tractar da l'onn avant è il pensum da lavur dals dus collavurats giuridics vegnì auzà temporarmain. Sper l'actività centrala – instrucziun davart la procedura, rediger las motivaziuns da las decisiuns, cussegliar la Cumissiun sco era d'organisar las tractativas – ha il Secretariat surdà ils dossiers dals recurs ch'existan be fisicamain a l'Uffizi federal per l'archiv. Vitiers vegn ch'il Secretariat ha già da responder l'onn passà extraordinariamain bleras dumondas dal public. Pervia da las mesiras da Covid-19 han ils collavurats dal Secretariat ademplì ina part relevanta da lur lavur en il homeoffice.

4 Finanzas

Administrativmain è l'Autorità da recurs part dal Secretariat general dal Departament federal per l'ambient, traffic, energia e communicaziun

(DATEC). Ensemen cun las autoritads independentas, suttamessas al DATEC, furma l'Autoritad da recurs l'„unidad organisatorica regulatorica d'infrastructura“ (Reginfra). Quella dispoziun dad in budget global. Il rom finanziel previs per l'Autoritad da recurs l'onn 2020 – en la summa dad 800'000 frs. per personal e material – ha pudì vegnir tegnida en. En il rom dad examinar la surveglianza tar radio e televisiun ha la controlla da finanzas da la Confederaziun era tschentà l'onn passà dumondas a l'Autoritad da recurs.

5 Posts da mediaziun dals realisurs da radio e televisiun

5.1 Posts da mediaziun dals realisurs privats da radio e televisiun

L'occupaziun dals Posts da mediaziun dals realisurs privats, nominads da l'Autoritad da recurs, è restada nunmidada. Il giurist da Sviz e specialist da medias, Oliver Sidler, maina il Post da mediaziun da las regiuns da la Svizra tudestga e retoromantscha, Denis Sulliger, advocat a Vevey, quel da la regiun romanda e Francesco Galli, advocat a Lugano, per la part taliana. Ils trais Posts independents da mediaziun han dad inoltrar mintg'onn a l'Autoritad da recurs in rapport. Davart lur activitad infurmeschan els la publicitad era tras la website communabla (<https://www.ombudsman-rtv-priv.ch>).

5.2 Procedura

Ils custs da la procedura da reclamar tar ils Posts da mediaziun han da princip ils realisurs dal program pertutgads da purtar. Excepziunalmain po l'Autoritad da recurs adossar tar reclamaziuns da levsenn sin proposta dal Post da mediaziun u dal realisatur dal program ils custs da procedura a quella persuna che ha inoltrà il recurs (art. 93, al. 5 LRTV). L'Autoritad ha già da decider l'onn passà trais giadas concernent talas propostas.

En sias decisiuns ha l'Autoritad da recurs punctuà che la procedura avant ils Posts da mediaziun sajan per persunas, che sa drizzan a quels, regularmain gratuitas. Quai valia era da princip per proceduras da reclamaziun tenor art. 92 LRTV. Tar ina procedura potenzialmain da levsenn èn perquai persunas da render expressivamain attentas ch'i saja da quintar tar il proxim recurs sumegliant cun il ristg ch'i dettia custs. In tal avis possia en il

senn prevegnent era succeder tar la conferma da l'inoltraziun d'in recurs da levsenn, uschia ch'igl exista anc la pussaivladad da retrair el senza custs. Il Post da mediaziun ha en mintga cas da render attent il recurrent sin las respectivas determinaziuns legalas.

L'Autoritad da recurs ha refusà tuttas trais propostas. Tar in cas ha l'Autoritad da recurs constatà che l'agir dal recurrent saja da caracter querulatoric. El aveva inoltrà entaifer intginas emnas in grond dumber da recurs cun adina las medemas reclamaziuns motivadas politicamain, ignorond la rolla dal Post da mediaziun sco intermediatur e pretendend sur mesira da princip ina procedura gratuita. Essend ch'il Post da mediaziun aveva tralaschà oravant da render attent a l'agir da levsenn, uschia era dad allegar il ristg collià da custs tar in ulteriur recurs ha l'Autoritad renvià la proposta. Tar in ulteriur cas tractà da l'Autoritad da recurs n'adempliva il recurrent betg il fatg dad avair agi nunponderà. Dad ina vart n'eran betg tut las reclamaziuns crititgadas motivadas e da l'autra vart eran dal temp da l'inoltraziun dals recurs anc adina pendentas proceduras dad el avant l'Autoritad da recurs.

Refusà ha l'Autoritad da recurs la finala era las propostas dad in pitschen realisatur local dad adossar ils custs a la recurrenta, ina commembra da l'executiva communal. Il proponent ha fatg valair ch'el n'haja evidentamain violà naginas determinaziuns dal program e che la recurrenta ch'era critica vers il realisatur stoppia perquai almain surpigliar ina part dals custs da procedura. Ils custs da procedura dal Post da mediaziun sajan considerabels per in pitschen realisatur betg commercial. En sia decisiun ha l'Autoritad da recurs rendì attent a la regulaziun da custs statuida en la LRTV avant il Post da mediaziun. Tenor quella ha da princip il realisatur pertutgà da purtar ils custs, era sch'ina reclamaziun è evidentamain na motivada. Auter fiss quai en il cas da reclamaziuns repetidas cunter in realisatur malvesi, per al far donn materialmain. In tal sa cuntegnair savess – sco reclamaziuns querulatoricas – esser arbitrar. Essend ch'i ha sa tractà tar il cas da giuditgar davart l'emprima reclamaziun cunter il realisatur, e ch'ils custs eran facturads correctamain dal Post da mediaziun, ha l'Autoritad da recurs refusà la proposta.

L'Autoritad ha gi da giuditgar sulettamain recurs da sorveglianza cunter il

Post da mediaziun da las regiuns italofofas. Talas reclamaziuns, inoltradas adina da las medemas personas, in pèr, ha l'Autorità da recurs considerà evidentamain per na motivadas.

5.3 Inscunter tranter ils Posts da mediaziun e l'Autorità

Ils 20 d'avust 2021 èn ils responsabels dals Posts da mediaziun dals realisatur da radio e televisiun s'inscuntrads a la sesida annuala. Prendì part ha er il represchentant da l'Uffizi federal da communicaziun (UFCOM) che ha da survegliar ils Posts da mediaziun da la SSR.

Da discurre ha dà tar quest inscunter la chargia differenta da lavur dals otg Posts da mediaziun, quai che ha era ses effect sin la lavur sco tala. Las pli bleras reclamaziuns ha registrà concernent las publicaziuns da SRF il Post da mediaziun per la Svizra tudestga. La rolla dals Posts da mediaziun, ch'intermedieschan e na giuditgeschan, vegn percepi per part betg gistamain. Eventualas ponderaziuns material-giuridicas en il rapport dal Post da mediaziun na pon uschia betg esser object d'ina procedura da recurs avant l'Autorità da recurs el senn da l'art. 94ss LRTV.

6 Procedura da recurs

6.1 Gestium

L'onn passà èn 30 novs recurs vegnids inoltrads (onn precedent: 43). 21 eran recurs populars (tenor art. 94, al. 2 e 3 LRTV). Tar quels èn ils recurrents vegnids sustegnids d'almain 20 ulteriuras personas che fissan era stadas legitimadas da far recurs (onn avant: 35). Vitiers èn anc vegnids otg recurs individuals, resp. da pertutgads tenor l'art. 94, al. 1 LRTV (onn precedent: 9). Tar quels ha la persona natirala u giuridica ina stretga relaziun cun l'object da la publicaziun crititgada. En in cas, in recurs cunter ina contribuziun instagram, è l'Autorità da recurs sa basada sin in interess public vid ina decisiun tenor l'art. 96, al. 1 LRTV. Plirs dals cas inoltrads han cumpiglià diversas reclamaziuns cunter emissiuns e publicaziuns differentas.

Ils Posts da mediaziun, subordinads a l'Autorità da recurs, han registrà

2021 en tut 1200 reclamaziuns visavi 1194 l'onn avant. 2,5 pertschient dals cas avant ils Posts da mediaziun èn vegnids inoltrads l'onn passà sco recurs tar l'Autoritad da recurs (2020: 3,6 procents).

L'onn passà ha l'Autoritad da recurs salvà durant nov dis tractativas publicas. Las mesiras statalas en connex cun Covid-19 han effectuà che l'Autoritad da recurs ha gì pliras sesidas digitalmain. Il record da recurs, inoltrads l'onn precedent, è era s'effectuà sin il dumber sur la media da cas ch'i ha dà per di da tractativas. Be tar las deliberaziuns da dus dis a la fin da schaner ha l'Autoritad da recurs prendì 19 decisiuns. La sesida ordinaria da dus dis, che fiss stada deditgada a la perfecziun il settember, ha l'Autoritad nizzegia exclusivamain per deliberar recurs ed uschia reducir las pendenzas.

6.2 Publicaziuns crititgadas

Ils 30 recurs, inoltrads l'onn passà, èn sa drizzads per la pli gronda part cunter emissiuns televisivas (18), cunter emissiuns radiofonicas è vegnì recurri set giadas e vers cuntegns online trais giadas. Dus recurs han pertutgà pliras medias. Per l'emprima giada è il cuntegn da la SSR ord il medium social instagram vegnì crititgà, che va giuridicamain sut la noziun „ulteriura purschida publicistica“ (art. 25, al. 3 bustab b. LRTV).

Pertutgà hai exclusivamain publicaziuns da la SSR, numnadamain SRF (23 giadas), RTS (4 giadas) e RSI (3 giadas). Ils novs recurs inoltrads han tangà emissiuns da novitads ed auters formats infurmativs. Tematicamain èn las mesiras statalas cunter Corona stadas en il center da las publicaziuns crititgadas, sco gia l'onn precedent. Anc han occupà l'Autoritad da recurs auters temas actuals, politics e societars, tranter auter 5G, dumondas d'asil e migraziun, protecziun dals consuments, dretg da lavur e las proximas votaziuns dal pievel.

6.3 Fatgs giuridics

Tar ils pli blers recurs ch'èn stads da giuditgar materialmain, è il cumond d'esser objectiv tenor l'art. 4, al. 2 LRTV stà en il center. Quel protegia la libra furmaziun da l'opiniun dal public. L'onn passà è sa tschentada tar l'Autoritad da recurs en plirs cas la dumonda, schebain las mancanzas con-

statadas sajan uschè gravantas, ch'ina violaziun tenor dretg saja dada. Las pretensiuns d'objectivitat ed equilibr na dastgan tenor la giurisdicziun dal Tribunal federal betg effectuar che spezialmain l'impurtanza da la libertad e spontanadad schurnalistica gajan a perder en ina societad democratica (guarda latiers era la cifra 8.2). L'autonomia da program scumonda als collavurats da las medias in'intervenziun giuridica da surveglianza, sch'ina emissiun na po betg cuntentar pervia da singulas mancanzas. Decisiva è la finala l'impressiun totala ch'ina emissiun u in'atra publicaziun intermediescha „en la media“ al public. Influenzeschan mancanzas pervia da nunobservaziun da l'obligaziun schurnalistica dad esser precaut dentant grevamain la furmaziun da l'opiniun a basa da las infurmaziuns intermedias, alura è la violaziun da l'obligaziun dad esser objectiv dada.

6.4 Recurs approvads

Tar ils 37 recurs liquidads (onn avant: 36) ha l'Autoritad da recurs constatà en sis cas ina violaziun dal dretg (2020: 5). Ella ha decidì ch'il cumond dad esser objectiv è vegnì violà en connex cun ina contribuziun radiofonica da RTS davart las brigadas medicinalas cubanas, cunter la quala trais recurs èn vegnids inoltrads (vesair cifra 7.1), plinavant ina novitad da radio SRF concernent la cunvegna pussaivla da basa tranter l'Uniun Europeica (UE) e la Svizra (guarda era cifra 7.2), tar ina emissiun dal magazin da consumers „A Bon Entendeur“ da la televisiun RTS concernent la cumpra online da mobiglias (vesair cifra 7.4), sco era tar ina emissiun da radio e televisiun da RTS concernent in cusseglier guvernativ genevrin (guarda era cifra 7.5). Las decisziuns prendidas èn tuttas en vigur.

A chaschun da las davosas deliberaziuns publicas il december ha l'Autoritad da recurs approvà trais ulteriurs recurs a basa da la violaziun constatada dal cumond dad esser objectiv. Pertutgada è ina contribuziun da radio SRF e l'artitgel online collià davart il pli prominent expert da radiofon mobil sco er ina contribuziun d'instagram da SRF News davart l'atgna scripziun gista da gender. Las motivaziuns a scrit da las decisziuns n'eran anc betg prontas a la fin da l'onn.

7 Or da la pratica da l'AIIR

Suandantamain vegnan decisiuns selecziunadas da l'onn passà preschentas. En il center stattan recurs sancziunads. Tut las decisiuns approvadas sa chattan cun la motivaziun cumpletta en furma anonimizada en la banca da datas sin la website da l'Autorità da recurs.

7.1 Decisiun b. 862/866/867, dals 28 da schaner 2021, pertutgant radio RTS, emissiun „Tout un monde“, contribuziun „Les médecins cubains envoyés à l'étranger en renfort dans la lutte contre Coronavirus“

Ils fatgs: Radio RTS emetta regularmain l'emissiun „Tout un monde“ davart temas internaziunals actuals. Part da l'emissiun dals 13 da matg 2020 è stada ina contribuziun davart l'engaschi da persunal medicinal spezialisà da la Cuba en l'exteriur per cumbatter il Coronavirus. L'actività da quellas brigadas medicinalas vegn preschentada en l'emissiun fitg criticamain. I sa tractia dad in business zunt lucrativ per il reschim tar la pandemia e quai sin donn e cust dal persunal spezialisà. En il rapport vegn discurs dad ina industria da la sanadad („une industrie de la santé“), lavur sfurzada („travail forcé“), cundiziuns nunpussaivlas e schizunt da sclavaria. Cunter quellas contribuziuns èn trais recurs populars vegnids inoltrads. Crititgà vegn spezialmain che l'emissiun saja unilateral, betg cumpletta e cuntegnia sbagls.

Valitaziun: La libertad da las medias e l'autonomia da program lubeschan als realisaders da televisiun da princip da s'exprimer criticamain concernent las activitads da regenzas. Las pretendiuns tenor dretg da program, sco en il cas dà, numnadamain dad observar il cumond dad esser objectiv, èn da resguardar. Da constatar è tar il cas da giuditgar ch'ils auditurs na savevan betg blier davart il tema tractà, concret concernent l'engaschi da las brigadas medicinalas cubanas tar Coronavirus en l'exteriur. La redacziun è perquai sa basada exclusivamain sin constataziuns da circuls critics vers la regenza. Siond ch'autras vuschs existentas n'èn betg vegnidas a pled, n'èsi betg stà da supponer tar ils auditurs che las constataziuns vegnidas fatgas durant l'emissiun eran dispitaivlas. L'optica uffiziala da la Cuba è vegnida intermediada a moda scursanida e tendenziosa. Era na consteva ina pre-

tensiun da la redacziun betg, numnadain ch'igl existia ina resoluziun da las Naziuns Unidas cunter la Cuba pervia da l'exploitaziun da ses personal medicinal spezialisà tras ils engaschis en l'exteriur.

Las mancanzas constatadas n'han betg pussibilità als auditurs da furmar in'atgna opiniun a basa da las infurmaziuns intermediadas. La contribuziun ha perquai violà il cumond da l'objectivitat. L'Autorità da recurs ha approvà unanimamain ils trais recurs.

7.2 Decisiun b. 877 dals 10 da matg 2021 pertutgant radio SRF, emissiun „Heute Morgen“ davart la cunvegna da basa tranter l'Unìun Europeica e Svizra

Ils fatgs: In recurrent popular ha crititgà nov contribuziuns da diversas emissiuns da radio e televisiun SRF, t.a. er ina novità da l'emissiun „Heute Morgen“ dals 29 da zercladur 2020. En quella è vegnì fatg allusiun ad ina intervista en la NZZ dal medem di cun l'antierur cumissari da la Cumissiun Europeica, Günther Oettinger. Quel è tranter auter era s'exprimì davart la cunvegna da basa tranter l'UE e la Svizra. Il recurrent ha fatg valair sbagls tar la comunicaziun radiofonica.

Valitaziun: Günther Oettinger vegn numnà en la comunicaziun radiofonica falladamain sco Cumissari da l'UE. Quella funcziun aveva el gì be fin a la fin dal 2019. La gronda part dals auditurs da „Heute Morgen“ n'astgass strusch avair realisà quest sbagl, siond ch'ìls nums dals commembers da l'Unìun Europeica – cun paucas excepziuns (spezialmain la presidenta) – n'astgassan strusch esser enconuschents en Svizra. Essend ch'ins aveva già menziunà avant faussamain en la comunicaziun, che questa cunvegna na vegnia tenor la UE betg realisada, han ils auditurs stuì supponer logicamain ch'i sa tractia da la posiziun dad in represchentant da l'UE e na dad ina valitaziun persunala d'in antierur cumissari. Quels dus sbagls pertutgan l'origin da questa impurtanta infurmaziun per la politica svizra dal temp da l'emissiun, na tangavan betg aspects laterals, mabain n'han betg pussibilità la furmaziun dad in'opiniun. Las obligaziuns schurnalisticas dad esser precaut sco l'examinaziun dals fatgs n'èn betg vegnidas resguardadas. La contribuziun ha perquai violà il cumond dad esser objectiva. L'Autorità ha sancziunà il recurs respectiv cun set cunter duas vuschs. Ils ulteriurs otg

recurs dal medem recurrent cunter publicaziuns da SRF ha l’Autorità da recurs refusà unanimamain.

7.3 Decisiun b. 878 dals 10 da matg 2021 concernent televisiun SRF, emissiun „Deville“ davart l’iniziativa pertutgant la responsabladad dals concerns

Il fatg: L’emissiun Late-Night-Show „Deville“, emessa il 22 da november 2020, è praticamain stada deditgada exclusivamain a l’iniziativa populara „Per interpresas da gronda responsabladad – per proteger uman ed ambient“ (Iniziativa concernent la responsabladad dals concerns). La votaziun dal pievel davart quell’iniziativa ha già lieu in’emna pli tard. En il recurs popular cunter quella emissiun è vegnì pretendì che las expectoraziuns davart quella iniziativa sajan stadas unilateralas e na admissiblas uschè curt avant la votaziun.

Valitaziun: L’emissiun crititgada è da caracter satiric-umoristic e primarmain divertenta. Tuttina èn las constataziuns fatgas lien davart l’iniziativa concernent la responsabladad dals concerns da cuntegn infurmativ che san era effectuar la furmaziun d’ina opiniun. Ils principis infurmativs da radio-diffusiun èn perquai applitgabels da princip er en tals formats. Igl è dentant da resguardar la muntada speziala che constataziuns satiricas gjaudan, siond ch’ellas crodan er en il sector protegent spezial da la libertad da las medias (art. 17 Cst.), da la libertad d’exprimer opiniuns (art. 16 Cst.) e da la libertad da l’art. (art. 21 Cst.).

Or da l’optica dal cumond dad esser objectiv ed en consequenza dal cumond da trasparenza èsi tar tals cuntegns primarmain necessari ch’il caracter satiric vegnia realisà dal public. Uschè lunsch ch’i vegnia sa referì sin tscherts eveniments u persunas, duajan las contribuziuns cuntegnair in nuscheigl vair. Quellas pretensiuns ha l’emissiun crititgada ademplì. Schizunt auditurs, che n’han betg enconuschì avant l’enconuscent comicher u l’emissiun astgassan spert avair realisà il caracter spezial a basa da numerus intermezzos satirics ed umoristics, decor, mimica, il sa preschentar dal moderatur e dals giasts. Ils divers cuntegns tematisads en l’emissiun – sco numnadamain la critica existenta vid insaquantas interpresas svizras multinazionalas pervia da tschertas activitads en pajais da svilup, il process

legislatoric cumplitgà tar l'iniziativa concernent la responsabladad ed en spezial la rolla da las Baseligias en la campagna da votaziuns – han rendì attent correctamain ad in nuscheigl realisabel. Uschia è il cumond dad esser objectiv – uschè lunsch che quel è applitgabel – betg vegnì violà.

Las pretensiuns spezialas che sa dattan dal cumond da multifariadad tenor l'art. 4, al. 4 LRTV e dad equilibr ed imparzialitad per emissiuns cun sa referir sin ina proxima votaziun u tschernà san ins observar be difficilmain tar tipics formats dad infurmaziun. Constataziuns satiricas visavi tscherts temas, eveniments u persunas èn numnadamain per definitionem betg neutralas u equilibradas, mabain pointilisticas e da caracter valitond. Contribuziuns da caracter satiric davart proximas votaziuns ed elecziuns fissan facticamain exclusas durant periodas sensibilas avant votaziuns, sch'ils principals menziunads per emissiuns dad infurmaziun vegnissan senza auter observads. Ina tala giurisdicziun na fiss betg cumpatibla cun il privilegi da la satira. Quest privilegi da la satira na dastga dentant betg vegnir abusà per directa propaganda politica. Quai cuntrafeschess a l'art. 34. al. 2 Cst., che protegia la libra veglia da furmar in'opiniun e da pudair dar giu la vusch nunfalsifitadamain avant la votaziun. Uschè lunsch mettan ils principals da radio-diffusiun cunfin a contribuziuns satiricas, era sch'els èn enconuschents en la perioda sensibla avant ina votaziun u elecziun. I po esser che la contribuziun n'ha tar l'applicaziun dals criteris per emissiuns dad infurmaziun betg orientà equilibradamain sur l'iniziativa. Uschia è la pauc flattanta preschentaziun dals concerns svizzers pervia da lur activitad en l'exteriur praticamain stada tras e tras negativa. Ins n'ha dentant betg fatg propaganda politica en il senn menziunà. Plitost han aspects da l'iniziativa davart la responsabladad dals concerns servì per preschentar e furmar satiricamain ed umoristicamain cun cumparegliaziuns, caricaturas, alienaziuns, exageraziuns ed autras stilisaziuns ed elements. Vers la fin da l'emissiun n'ha Dominic Deville dà ora nagina raccomandaziun, co votar, mabain sulet appellà al public dad ir a votar, „egal per Yin u Yank“. En l'emissiun n'han ins dà a nagin dal comité pro ina plattafurma da far reclama per l'iniziativa. Uschè lunsch ch'el è stà applitgabel n'è il cumond da multifariadad tenor art. 4, al. 4 LRTV betg vegnì violà. Cunquai che l'emissiun ha resguardà las pretensiuns minimalas tar il cuntegn dal program ed era observà il cumond dad objectivitad e multifariadad ha l'Autoritad refusà unanimamain il recurs.

7.4 Decisiun b. 879 dals 17 da zercladur 2021 davart televisiun RTS, emissiun „A Bon Entendeur“, contribuziun „La table-fantôme“

Ils fatgs: En il rom dal magazin da consumers „A Bon Entendeur“ ha la RTS emess ils 21 da schaner 2020 la contribuziun „La table-fantôme“. Lien hai sa tractà da la cumpra online da mobiglias. Ina dunna ha descrit sias nauschas experientschas cun in'interpresa. La maisa per il salun, empustada e pajada, n'è mai vegnida furnida. L'interpresa è vegnida crititgada en la contribuziun, ha recurri e reclamà ch'ella na saja betg vegnida confruntada cun las rinfatschas da la redacziun.

Valitaziun: Betg da rinfatschar è che la redacziun dad „A Bon Entendeur“ è s'engaschada investigativamain per la consumenta. Quest focus sa basa per il magazin da consumers sin l'autonomia da program. Sche rinfatschas gravantas vegnan fatgas vers persunas, valan dentant pretensiuns qualificadas pertutgant trasparenza e l'observaziun da las obligaziuns schurnalisticas da precauziun. La persuna attatgada è da confruntar cun il material engrevgiant e ses punctg da vista duai vegnir exprimì tras ses megliers arguments.

En il cas dà èsi stà dispitaivel, schebain la redacziun aveva confruntà avant la firma crititgada cun las rinfatschas. Ella ha bain rendì attent a las fadias da contactar, ma n'ha betg pudì documentar quai. Er en la contribuziun emessa mancava in avis sin ils motivs per la posiziun che n'è betg succedida. Cunquai che l'optica da l'interpresa n'è betg suandada, n'ha il public betg pudì furmar in'atgna opiniun tenor il cumond dad esser objectiv. Cun set cunter duas vuschs ha l'Autoritad approvà il recurs.

7.5 Decisiun b. 883 dals 17 da zercladur 2021 pertutgant RTS, emissiun radiofonica „La Matinale“, contribuziun „Pierre Maudet visite de nuit son ancien bureau“ e l'emissiun televisiva „Le 12h45“, contribuziun „Le Conseiller d'Etat s'est rendu régulièrement dans les locaux qu'il n'est plu censé fréquenter. Enquête“

Ils fatgs: Ils 15 da december 2020 han radio e televisiun RTS emess ina contribuziun davart l'anteriur cuss. guv. genevrin Pierre Maudet. Igl ha sa tractà da sias visitas nocturnas en ils anteriurs biros, suenter che la regenza

chantunala al aveva retratg transitoricamain ses departament. Cunter las duas contribuziuns criticas ha Pierre Maudet recurri. El ha numnadamain crititgà las reportaschas tendenziusas ed intransparentas.

Valitaziun: Ord vista dal cumond dad esser objectiv è sa tschentada primar-main la dumonda, schebain l'opiniun dal politicher crititgà da Geneva è vegnida exprimida commensuradamain en las duas emissiuns. In redactur aveva gi tramess a Pierre Maudet il di avant l'emissiun diversas dumondas davart la legitimaziun ed ils motivs per sias visitas nocturnas. Las respostas correspondentas aveva il redactur anc survegnì il medem di. En las contribuziuns emessas vegn sulet menziunà che las decleranzas da Pierre Maudet per sias visitas nocturnas sajan stadas evasivas, era sch'el era s'exprimi en sias respostas davart ils aspects tematisads cler e bain. L'optica da Pierre Maudet visavi las rinfatschas vers el n'èn vegnidas intermediadas ni correctamain ni sufficientamain. Il public n'ha pia betg pudì furmar in'atgna opiniun concernent ils temas tractads e la redacziun aveva uschia violà las obligaziuns schurnalisticas da precauziun ed il cumond da trasparenza e fairness. Cun set cunter ina vusch (contribuziun radiofonica) e cun sis cunter duas vuschs (emissiun televisiva) ha l'Autoritad constatà ina violaziun dal cumond d'esser objectiv ed approvà ils recurs.

8 Tribunal federal

Decisiuns da l'Autoritad da recurs da cuntegn public-giuridic pon vegnir contestadas directamain tar il Tribunal federal. La partiziun publica-giuridica cumpetenta II ha gi da giuditgar l'onn passà dus recurs respectivs.

8.1 Deliberaziuns publicas da l'AIIR

Tar l'emprim cas èsi i per la deliberaziun publica en il rom dad ina procedura avant l'AIIR. L'art. 97, al. 1 LRTV preveda che las deliberaziuns da l'Autoritad da recurs sajan publicas, „sche interess privats, degns da vegnir protegids, na stettian betg en cuntradicziun cun quai“. A chaschun da talas tractativas publicas avess l'Autoritad da recurs gi da giuditgar davart duas publicaziuns (contribuziun televisiva e rapport online), cunter las qualas in advocat pertutgà aveva recurri. Las publicaziuns tematisavan consequen-

zas pussaivlas da l'agir investigativ fallà sco era la privaziun da l'admissiun sco advocat. Els han declarà quai a basa dad in exempel, n'han dentant betg menziunà il num da l'avocat pertutgà. L'Autorità da recurs ha refusà la proposta dal recurrent da manar las tractativas senza public. Questa disposiziun provisorica ha il recurrent tratg vinavant al Tribunal federal.

Il Tribunal federal renda attent en sia decisiun dals 5 d'october 2021 (2C_327/2021) a parallelas tranter l'art. 97, al. 1 LRTV tar la procedura prest giuridica da l'Autorità da recurs e la regulaziun tenor l'art. 59 da la Lescha federala da dretgira (LFD; CS 173.110) pertutgant sias atgnas deliberaziuns publicas. I vegn punctuà, era en vista a las materialas legalas ch'il princip da deliberaziuns publicas servi na be a la protecziun da las partidas, mabain saja era dad interess public. Quai procura per trasparenza, uschia ch'il public possa examinar e sez perseguitar la procedura e la giurisdicziun. A basa da la muntada principala dastga ina exclusiun dal public vegnir lubida be restrictivamain, sch'interess predominants pretendian quai cleramain.

En il cas da giuditgar èn tant il Tribunal federal sco l'Autorità da recurs vegnids a la conclusiun che las premissas per far in'exceptiun dal princip da las tractativas publicas n'èn betg datas. El fa era attent ch'in dossier da tractar cuntegnia nagins acts publics u infurmaziuns davart la sfera privata. Siond che l'Autorità da recurs aveva communitgà en sia disposiziun provisorica, ch'ella na menziuneschia en il rom da sias deliberaziuns publicas betg ses num, vegnan uschia era ses interess privats resguardads. Il Tribunal federal ha perquai refusà il recurs.

8.2 Televisiun SRF, emissiun „DOK“ dals 4 da december 2019, „Der Preis der Aufrichtigkeit – Adam Quadronis Leben nach dem Baukartell“

Object d'ina ulteriura procedura è stada l'emissiun dal film documentar, dals 4 da december 2019 tras la televisiun SRF: „Der Preis der Aufrichtigkeit – Adam Quadronis Leben nach dem Baukartell“. In recurs cunter quest purtret davart il whistleblower ha l'Autorità da recurs approvà cun la decisiun b. 849 dals 28 d'avust 2020 tras quatter cunter trais vuschs. La SSR sco realisatura pertutgada ha recurri cunter quella decisiun tar il Tribunal federal.

Il Tribunal federal lascha en sia sentenza dals 2 da december 2021 (2C_112/2021) averta la dumonda, schebain l'Autorità da recurs ha approvà nungiustificadamain, ch'il recurrent haja ademplì las premissas per in recurs da pertutgà tenor l'art. 94, al. 1 LRTV. En il cas dà è il recurrent vegnì tratg activamain da la producenta dal film documentar en las preparativas per quel. Igl è sa dà in contact regular dad e-mail e telefon tranter els dus e schizunt vegnì tar ina intervista cun el che n'è dentant betg vegnida emessa. Il Tribunal federal punctuescha expressivamain ch'il dretg per in recurs da pertutgà saja d'affirmar be reservadamain.

Materialmain dispaiteivel è stà il giuditgar passadis davart la rolla dal president numnà da la Dretgira regionala pertutgant il destin persunal dad Adam Quadroni. Sco l'Autorità da recurs tegna er il Tribunal federal las rinfatschas cunter il derschader en il film per gravantas. Decisiv segund il cumond dad esser objectiv – è „schebain igl è cler tgi che ha fatg las rinfatschas respectivas e schebain l'object sco tal vegn exprimì commensuradamain en il rom da l'obligaziun schurnalistica da precauziun“, uschia ch'il public ha pudì far in agen maletg davart la rolla dal president da la Dretgira regionala. Da giuditgar è era stà il fatg ch'il derschader ha laschà in e-mail da l'autura da prender posiziun davart las rinfatschas fatgas dad Adam Quadroni e ses advocat senza risposta. Tenor il Tribunal federal n'astgan rapports betg depender „da la veglia e la prontezza da terzs da prender part ad ina emissiun u metter a disposiziun infurmaziuns e documents“. Da resguardar è era ch'ina refusa da cooperar renda difficil da pudair rapportar autenticamain davart ils fatgs. Igl è dentant da rapportar objectivamain davart ils motivs, daco ch'ina persuna dumandada renunzia da prender posiziun. Tenor il Tribunal federal han avis en il film documentar fatg sortir la vaira situaziun. Cler è stà per il public da tgi che las rinfatschas derivavan mintgamai.

Il Tribunal federal renda era attent ch'ils puncts crititgads pertutgian aspects laterals dal raquint principal. Tut en tut n'han quels betg influenzà il purtret davart Adam Quadroni a moda giuridicamain relevanta. La contribuziun avess ins pudì realisar e mussar autramain, en singuls puncts meglier. Il cumond dad esser objectiv n'è dentant betg vegnì violà quattras. Las mancanzas constatadas derivan dal fatg ch'il president da la Dretgira regionala n'è betg stà pront da preschentar sia optica, quai che fiss stà

pussaivel almain parzialmain era senza violar il secret d'uffizi. Il Tribunal federal ha approvà ord quellas raschuns il recurs da la SSR ed annullà la decisiun contestada da l'AIIR.

9 Fatgs internaziunals

L'AIIR fa dapi 1996 part da l'European Platform of Regulatory Authorities (EPRA; <https://www.epra.org>). Tar l'EPRA sa tractia d'ina organisaziun independenta. A quella appartegnan 55 Autoritads da radio-diffusiun ord 47 pajais. L'Uniun Europeica, il Cussegl d'Europa, il Post d'infurmaziun audio-visual sco era l'incumbensadra per la libertad da las medias da l'Organisaziun per segirezza e collavuraziun en l'Europa (OSZE) disponan da status permanent sco observaturs. En il center stat il barat informal dad opiniuns ed infurmaziuns.

Sco gia l'onn passà han las dietas prevedidas da l'EPRA stuì vegnir organisadas pervia da la situaziun da Covid-19 online. Temas èn stads t.a. Hate Speech e pervia da la convergenza industrial creschenta la collavuraziun cun regulaturs, resp. Autoritads da surveglianza d'auters secturs (telecomunicaziun, protecziun da datas). Sco nov president da l'EPRA è il Slovak Lubos Kuklis vegni tschernì.

10 Giuventetgna e medias

L'Autoritad da recurs (AIIR) è stada represchentada en la Gruppa centrala naziunala da la plattafurma „Giuventetgna e medias“ per promover las cumpetenzas da medias. Per quella è l'Uffizi federal per segiranzas socialas cumpetent. La Gruppa centrala ha accumpagnà la plattafurma sin ils secturs da la protecziun reglanta educativa da medias per uffants e giuvenils tar las medias sin plaun strategic. Suenter ch'il Cussegl federal ha publictà ils 25 d'avust 2021 il rapport davart las mesiras educativas da proteger la giuventetgna per ils onns 2016 – 2020 e las activitads futuras da „Giuventetgna e medias“ è quella Gruppa centrala vegnida dissolvida. Access al rapport d'evaluaziun han ins sin la „online-plattform“.

11 Infurmaziun da la publicitad

En il center da la lavur publica da l'Autoritad da recurs stat la website. Là orientescha l'Autoritad da recurs davart sia activitad, la procedura, las cundiziuns giuridicas generalas sco era concernent sia organisaziun. Integrada è era ina banca da datas cun tut las decisiuns da l'Autoritad da recurs dapi l'onn 1998 en furma anonimisada. Cumplettend la website, infurmescha l'Autoritad da recurs regularmain sur ses twitter-account @UBI_AIEP_AIRR. Suentar las deliberaziuns publicas publitgescha l'Autoritad da recurs mintgamai ina communicaziun a las medias davart ils cas tractads e decidids. Responsabla per la lavur publica è la presidenta che ha era preni part l'onn passà da diversas occurrenzas ed orientà davart l'activitad da l'Autoritad da recurs.


Agiunta I: Cumposiziun da l'AIRR

Commembers/-bras	en uffizi dapi	elegi fin
Mascha Santschi Kallay (advocata e cussegliaadra da communica- ziun, LU)	01-10-2016 presidenta	31-12-2023
Catherine Müller (advocata e mediatura, SO)	01-01-2014 vicepresidenta	31-12-2023
Delphine Gendre (giurista, FR)	01-02-2021	31-12-2023
Nadine Jürgensen (schurnalista e moderatura, ZH)	01-01-2018	31-12-2023
Edy Salmina (advocat, TI)	01-01-2016	31-12-2023
Reto Schlatter (manader da studis, ZH)	01-01-2015	31-12-2023
Maja Sieber (giurista, ZH)	01-01-2016	31-12-2023
Armon Vital (advocat e notar, GR)	01-01-2019	31-12-2023
Stéphane Werly (incumbensà chantunal da la protecziun da datas e docent per dretg da medias, GE)	01-01-2012	31-12-2023

Secretariat giuridic	en uffizi dapi	per
Pierre Rieder (manader dal Secretariat)	01-10-1997	90 % (dals 01-04-2021 tochen 31-03-2022 100 %)
Ilaria Tassini Jung	21-08-2012	60 % (dals 01-05-2021 tochen 30-04-2022 70 %)

Chanzlia	en uffizi dapi	per
Nadia Mencaccini	01-05-2006	50 %

Agiunta II: Indicaziuns statisticas per l’interval da 1984 – 2021



1984	1985	1986	1987	1988	1989	1990	1991	1992	1993	1994	1995	1996	1997	1998	1999	2000	2001	2002
------	------	------	------	------	------	------	------	------	------	------	------	------	------	------	------	------	------	------

Procedura da recurs

entrads	39	23	21	18	24	32	40	50	18	16	13	28	21	25	18	25	25	22	18
liquidads	31	25	23	16	17	36	35	42	29	22	10	23	29	24	16	28	26	20	18
pendents	8	6	4	6	13	9	14	21	10	4	8	13	5	6	8	5	4	6	6

Legitimaziun

recurs populars / interess public	11	8	6	5	9	11	31	33	10	7	9	16	17	20	14	20	25	16	15
recurs individuals	28	15	15	13	15	21	9	17	8	9	4	12	4	5	4	5	0	6	3
departament																			

Realisatur pertutgà

SSR / RDRS / SRF Radio	11	6	3	3	3	7	6	13	5	2	4	3	2	2	2	2	2	1	4
SSR / TVDRS / SF / SRF Fernsehen	13	9	12	7	14	16	29	29	11	8	5	20	17	16	11	13	16	12	5
SSR / RSR / RTS Radio	2	2	0	0	0	1	1	0	0	0	0	0	0	0	0	0	0	0	1
SSR / TSR / RTS TV	9	5	5	4	4	5	4	3	1	3	1	3	0	4	4	2	1	1	4
SSR / RSI Radio	0	0	0	0	0	1	0	0	0	0	1	0	1	0	0	1	0	1	1
SSR / RSI TV	2	1	0	1	0	0	0	0	0	1	1	1	0	1	0	1	1	3	0
SSR / RTR Radio Television Svizra Rumantscha	0	0	0	0	0	0	0	0	0	0	0	0	0	0	0	0	0	0	1
SSR / diversas emissiuns / publicaziuns	1	0	1	1	2	0	0	2	0	2	0	0	0	0	0	0	0	0	0
SSR / ulteriura purschida publicistica (upp)									0	0	0	0	0	0	0	2	0	0	0
Radios locals	1	0	1	2	1	1	0	2	1	0	0	1	0	0	0	1	0	1	0
Televisiuns localas	0	0	0	0	0	0	0	0	0	0	0	0	1	0	1	0	0	0	0
Ulteriurs realisaders privats da televisiun	0	0	0	0	0	0	0	0	0	0	1	0	0	1	0	3	5	3	2
Emess da l'exteriur	0	0	0	0	0	0	0	1	0	0	0	0	0	1	0	0	2	0	0

Liquidà cun

pacificaziun	0	0	0	0	0	6	2	1	2	1	0	2	1	0	0	0	0	0	0
brev da mediatuor	3	2	1	3	2	6													
decisiun da betg entrar	3	6	5	1	0	10	7	8	1	9	3	6	14	7	2	4	4	5	1
decisiun materiala	23	16	13	10	14	12	24	32	23	12	7	14	14	17	14	22	22	15	17
retratg	2	1	4	2	1	2	2	1	3	0	0	1	0	0	0	2		0	0

Decisiuns materialas

nagina violaziun da la concessiun	23	14	13	10	11	10	24	29	21	11	8	10	13	13	10	14	19	14	10
violaziun da la concessiun	0	2	0	0	3	2	0	3	2	1	2	4	1	4	4	8	3	1	7

2003	2004	2005	2006	2007	2008	2009	2010	2011	2012	2013	2014	2015	2016	2017	2018	2019	2020	2021
------	------	------	------	------	------	------	------	------	------	------	------	------	------	------	------	------	------	------

Procedura da recurs

entrads	14	25	20	20	30	25	16	14	18	20	18	20	26	19	31	26	30	43	30
liquidads	17	20	21	22	19	21	25	13	23	20	18	14	23	28	16	27	35	36	37
pendents	3	8	7	7	17	21	11	13	9	9	8	11	15	6	21	20	15	22	15

Legitimaziun

recurs populars / interess public	12	20	13	15	19	17	7	9	12	10	9	15	16	16	23	22	22	35	22
recurs individuals	2	5	7	5	10	7	9	5	6	10	9	5	10	3	8	4	8	8	8
departament					1	1	0	0	0	0	0	0	0	0	0	0	0	0	0

Realisatur pertutgà

SSR / RDRS / SRF Radio	2	0	2	3	3	5	1	2	1	2	4	4	7	3	4	1	2	2	6
SSR / TVDRS / SF / SRF Fernsehen	7	19	11	7	16	15	11	6	10	11	10	9	9	10	17	15	14	19	13
SSR / RSR / RTS Radio	0	1	0	0	1	1	0	0	0	0	1	2	1	1	0	0	0	3	0
SSR / TSR / RTS TV	2	1	1	0	6	1	2	3	3	3	2	3	5	2	0	6	1	2	3
SSR / RSI Radio	0	0	0	0	0	0	0	0	0	0	0	1	1	0	0	0	0	0	1
SSR / RSI TV	1	3	5	2	2	1	1	0	0	1	0	0	1	1	1	2	3	3	2
SSR / RTR Radio Television Svizra Rumantscha	0	0	0	0	0	0	0	0	0	0	0	0	0	0	1	0	0	1	0
SSR / diversas emissiuns / publicaziuns	0	0	0	2	0	0	0	0	2	1	1	1	1	1	0	0	3	7	2
SSR / ulteriura purschida publicistica (upp)	0	0	0	1										1	7	0	2	0	3
Radios locals	0	0	0	0	1	0	1	1	2	0	0	0	1	0	0	1	1	0	0
Televisiuns localas	0	0	0	2	1	1	0	1	0	2	0	0	0	0	0	1	3	6	0
Ulteriurs realisaders privats da televisiun	2	1	1	3	0	1	0	1	0	0	0	0	0	0	1	0	1	0	0
Emess da l'exteriur	0	0	0	0	0	0	0	0	0	0	0	0	0	0	0	0	0	0	0

Liquidà cun

pacificaziun	0	0	0	0															
brev da mediatur																			
decisiun da betg entrar	3	3	3	8	4	6	5	2	3	3	2	2	3	4	8	3	13	11	7
decisiun materiala	12	16	18	14	14	15	20	11	19	16	15	12	19	24	8	24	22	24	28
retratg	2	1	0	0	1	0	0	0	1	1	1	0	1	0	0	0	0	1	2

Decisiuns materialas

nagina violaziun da la concessiun	11	12	11	10	9	11	16	8	13	12	13	11	16	20	7	20	19	19	22
violaziun da la concessiun	1	4	7	4	5	4	4	3	6	4	2	1	3	4	1	4	3	5	6

